

四庫全書

子部

欽定四庫全書

子部

皇極經世書卷六上

詳校官中書<sub>臣</sub>呂光復

璽臺郎<sub>臣</sub>倪廷梅覆勘

總校官編修<sub>臣</sub>王燕緒

校對官編修<sub>臣</sub>沈清藻

謄錄監生<sub>臣</sub>莊承簪

欽定四庫全書

皇極經世書卷六上

宋 邵雍 撰

觀物篇三十一 以運經世七

經元之甲一

經會之午七

經運之巳一百八十六

經世之子二千二百二十一

甲子周威烈王九年魏城少梁

乙丑秦靈公卒季父立是謂簡公

丙寅

丁卯魏伐秦韓伐鄭

戊辰齊伐晉魏伐中山

己巳

庚午齊田莊子卒子太公和繼趙城平城

辛未魯元公卒子顯繼是謂穆公

壬申晉韓武子卒子景侯度繼趙獻子卒子烈侯籍繼

魏伐秦

癸酉韓伐鄭取雍邱魏滅中山楚簡王卒子當繼是謂

聲王

甲戌鄭伐韓取負黍

乙亥宋昭公卒子悼公購繼趙以田公仲為相

丙子齊宣公卒子康公貸繼田惠以廩邱叛

丁丑

戊寅晉韓趙魏求為諸侯于周

已卯周威烈王崩太子驕嗣位是謂安王楚聲王遇盜卒子疑立是謂悼王

庚辰秦攻魏陽狐

辛巳秦簡公卒子惠公繼韓景侯卒子烈侯繼趙烈侯卒弟武侯立魏文侯以卜子夏段干木為師西門豹為將守鄴吳起為將守西河田成子為相樂羊為將同韓趙伐楚至于乘丘

壬午

癸未

甲申韓盜殺相俠累

乙酉

丙戌晉烈公卒子孝公繼

丁亥

戊子魏伐鄭取酸棗又敗秦軍于注楚伐韓取負黍

己丑

庚寅齊田和徙其君康公于海上食一城秦伐韓宜陽

拔六城韓趙大敗楚師于大梁

辛卯魯敗齊于平陸齊伐魏取襄陵

壬辰秦伐魏侵晉

癸巳齊田和會魏文侯于濁澤求為諸侯魏請于周及諸侯皆許之

經世之丑二千二百二十二

甲午周安王十五年秦惠公卒出子悼公繼韓烈侯卒  
子文侯繼魏文侯卒子武侯繼趙武侯卒烈侯子



敬侯繼

乙未田和稱諸侯于齊列于周紀魏攻趙邯鄲

丙申韓伐鄭取陽城伐宋執宋公于彭城魏城安邑及

王垣趙師破齊于靈丘齊太公和卒子桓公午繼

秦庶長改殺出子及其母迎靈公之子于河西立

之是謂獻公

丁酉趙破齊師于廩丘

戊戌魏敗趙師于兔臺

己亥齊魏以衛伐趙取剛平

庚子趙會楚伐魏取棘蒲楚悼王卒盜殺相吳起王子  
繼是謂肅王誅害吳起者七十餘家

辛丑齊伐燕取桑丘

壬寅齊康公死于海上齊桓侯卒子因齊立是謂威王  
癸卯晉孝公卒子靜公俱酒繼韓趙魏伐齊至于靈丘  
甲辰韓文侯卒子哀侯繼趙攻中山戰于房子魯穆公  
卒子共公繼

乙巳周安王崩太子喜嗣位是謂烈王魏武侯韓哀侯  
趙敬侯同滅晉而三分其地以靜公爲家人食端  
氏一城

丙午韓滅鄭徙都之趙敬侯卒子成侯繼宋休公卒子  
辟公繼

丁未

戊申魯伐齊入陽關趙伐齊至博陵

己酉衛拔齊薛陵攻趙北蘭趙拔魏卿邑七十三宋辟

公卒子剔成繼

庚戌韓嚴弑其君哀侯立其子懿侯魏武侯卒公子爭

國趙伐魏立公子瑩是謂惠王趙敗秦軍于鄣安

辛亥趙伐齊至鄆魏敗趙師于覃懷齊威王烹阿夫

封即墨大夫萬家楚肅王卒弟良夫繼是謂宣王

壬子周烈王崩弟扁嗣位是謂顯王齊西敗趙魏之師

于濁澤趙輸長城魏入觀齊魏敗韓于馬陵

癸丑韓魏攻周

甲寅趙韓分周為二

乙卯魏會趙攻秦不利于洛陽

丙辰齊攻秦不利于石門魏伐宋取儀臺

丁巳周顯王西賀秦獻公魏與秦會于杜平

戊午

己未秦獻公卒子孝公繼敗魏師于少梁魏敗韓師于

澮

庚申魏拔趙皮牢

辛酉致文武胙于秦孝公東周君惠公卒子傑繼韓趙

魏伐齊

壬戌秦用衛鞅韓懿侯卒子昭侯繼

癸亥

經世之寅二千二百二十三

甲子周顯王十二年宋取韓黃池齊封鄒忌為成侯

乙丑趙會燕于河上會齊于平陸魯衛宋鄭朝魏

丙寅魯共公卒子康公繼齊會趙于郊會魏于平陸會

秦于杜平

丁卯秦攻魏師于元里取少梁魏圍趙邯鄲

戊辰韓攻東周君取陵觀及邢邱齊田忌孫臏救趙敗

魏于桂陵是年齊始稱王

己巳秦大良造衛鞅會韓趙之師圍魏襄陵

庚午韓用申不害為相秦趙伐魏魏歸趙邯鄲盟于漳

水之上

辛未趙成侯卒世子繼是謂肅侯秦開阡陌大築冀闕

于咸陽自雍徙都之

壬申

癸酉趙奪晉君端氏徙之屯留秦初為賦

甲戌

乙亥魯康公卒子景公繼

丙子

丁丑

戊寅周顯王錫秦孝公命為伯齊威王卒子宣王辟疆



繼

己卯諸侯西賀秦

庚辰齊人救韓田忌田嬰孫臏大敗魏師于馬陵獲將  
龐涓及世子申

辛巳楚宣王卒子威王繼秦奪魏河西七百里魏去安  
邑徙都大梁

壬午

癸未秦孝公卒子惠文君繼是謂惠王商鞅奔魏魏不

受入于秦

甲申秦惠文君夷商鞅族蘇秦入秦秦不受

乙酉周顯王西賀秦孟軻為魏卿

丙戌秦拔韓宜陽魏惠王卒子襄王繼齊宣王會魏襄

王于鄆

丁亥蘇秦會趙燕韓魏齊楚六國之師盟于洹水之上

以攻秦至于函谷韓作高門是年楚滅越獲王無

彊盡取其地東開地至浙江魏始稱王田嬰為相

戊子燕文公卒子易王立韓昭侯卒子惠王立楚敗齊  
師于徐州齊田嬰詐楚故不利

己丑齊會魏伐趙又伐燕取十城

庚寅秦伐魏

辛卯宋亂公弟偃弑其君代立是謂元王

壬辰楚威王卒子懷王槐繼魏伐楚取陘山秦伐魏取  
汾陰

癸巳秦用張儀為相陳軫適楚楚滅蜀魏輸秦上郡

經世之卯二千二百二十四

甲午周顯王四十二年齊會魏攻韓之桑邱

乙未趙肅侯卒子定繼是謂武靈王齊用孟軻為上卿

丙申孟軻去齊

丁酉秦始稱王齊宣王卒子湣王地繼秦築上郡塞

戊戌韓燕稱王楚破魏襄陵入城移兵攻齊秦張儀會

齊楚執政于齧桑

己亥秦張儀出相魏燕會韓魏二君于區鼠

庚子周顯王崩子定嗣位是謂慎靚王是年趙始稱王  
齊封田嬰于薛盜殺蘇秦于齊蘇代復相燕燕王  
卒子噲繼子之專國蘇代使齊

辛丑宋伐楚取地三百里始稱王秦齊交婚

壬寅魏襄王卒子哀王繼張儀復相秦

癸卯楚會齊趙韓魏燕攻秦不利齊獨後秦穰里疾大  
敗六國之師獲將申差及韓魏二公子

甲辰齊敗魏師于觀津與秦爭雄雌魯景公卒子平公

繼秦敗韓師于濁澤韓請割名都一以助伐楚既而背之秦又伐韓敗韓師于岸門楚救不至燕王噲以國屬子之

乙巳齊伐燕秦伐趙拔中都及西陽

丙午周慎靚王崩子延繼是謂赧王稱西周君秦拔義渠二十五城又取韓之石章

丁未楚齊和親燕亂將市被攻子之不克返攻世子又不克死

戊申楚攻秦不利秦伐齊楚救不至秦張儀結楚樗里疾攻趙

己酉楚懷王大伐秦不利又伐又不利秦庶長魏章會齊韓之師大敗楚師于藍田又敗之于丹水之陽獲其將屈丐遂取漢中地置黔中郡韓宣王卒世子蒼繼是謂襄王齊以五都兵攻燕燕亂國人立太子平是謂昭王

庚戌楚屈原使齊秦張儀使楚會楚會齊韓趙魏燕六

國西事秦至咸陽而秦惠王卒子武王繼燕起金  
臺以禮郭隗樂毅自魏至鄒衍自齊至劇辛自趙  
至

辛亥秦會魏于臨晉張儀魏章適衛樗里疾甘茂為相  
壬子楚合齊以善韓

癸丑秦武王會魏哀王于應會韓襄王于臨晉

甲寅東西二周君相攻楚圍韓之雍邱秦甘茂拔韓之  
宜陽武王舉周鼎絕脈而死國人迎母弟稷于趙



而立之是謂昭襄王太后臨朝稱制魏冉專政趙武靈王改用胡服

乙卯秦復韓武遂嚴君疾向壽為相甘茂適魏

丙辰楚絕齊以善秦

丁巳秦昭王與楚懷王會于黃棘復之上庸

戊午齊韓魏攻楚楚求救于秦魯平公卒子文公賈繼

秦取韓武遂拔魏蒲坂

己未秦復魏蒲坂會韓于武遂

庚申楚伐秦不利秦昭襄王會齊韓魏伐楚敗之于重

邱

辛酉齊孟嘗君入秦為質

壬戌楚懷王放大夫屈原于江濱與秦昭襄王會于武

關不復國人迎太子橫于齊而立之是謂頃襄王

其弟子蘭為令尹齊歸秦涇陽君孟嘗君自秦逃

歸秦會齊魏伐楚取八城趙拔燕中山攘地北至

燕代西至九源

癸亥齊會韓魏伐秦至于函谷秦伐楚取十六城趙武  
靈王稱主父會羣臣于東宮廢太子章而授庶子  
何立是謂惠文王以肥義為之相北略地南入秦  
稱使者

經世之辰二千二百二十五

甲子周赧王十八年楚懷王于秦逃歸不克

乙丑楚懷王卒于秦楚遂絕秦魏哀王卒子昭王繼齊  
會韓魏趙宋五國之兵攻秦至鹽氏而還秦與韓

魏河北及封陵以和韓襄王卒子釐王繼趙主父  
滅中山徙其王于膚施封廢太子章于代號安陽  
君使田不禮為之相

丙寅秦免樓緩相穰侯魏冉復相率師攻魏趙安陽君  
及不禮作難公子成及大夫李兌平之主父死于  
沙邱宮

丁卯秦向壽伐韓拔武始

戊辰楚與秦復和韓伐秦不利秦左庶長白起大敗韓

及諸侯之師于伊闕取城五坑軍二十四萬獲將  
公孫喜

己巳楚逆婦于秦秦魏冉免相大良造白起伐魏取垣  
攻楚拔宛

庚午秦魏冉復相封陶邑司馬錯伐韓軹及鄧

辛未齊有田甲之難免孟嘗君相魏獻河東地方四百  
里入秦韓獻武遂二百里入秦趙會齊伐韓

壬申齊復孟嘗君相秦伐韓拔六十一城

癸酉齊秦約稱東西帝復罷

甲戌齊孟嘗君謝病秦昭襄王巡漢中及上郡河北拔  
魏新垣及曲陽

乙亥齊滅宋至于泗上十二諸侯鄒魯之君皆稱臣南  
取楚之淮北西侵韓趙魏魏獻秦安邑秦伐魏之  
河內攻韓之夏山

丙子齊孟嘗君以薛屬魏秦昭襄王會楚頃襄王于宛  
會趙惠文王于中陽伐齊拔九城

丁丑燕樂毅會秦楚韓魏五國之師伐齊大敗齊師于濟西遂入臨菑拔城七十拜樂毅上卿封昌國君留園齊即墨及莒齊湣王保莒楚使淖齒救齊殺齊湣王于莒莒人立其子法章是謂襄王荀卿行祭酒

戊寅楚頃襄王會秦昭襄王于鄢秦穰侯伐衛至于國已卯秦昭襄王會韓釐王于新城會魏昭王于新明伐趙拔二城伐韓取六邑

庚辰楚會魏趙伐秦秦伐楚魏再復相趙使藺相如入

秦獻璧

辛巳楚割上庸及漢中請和于秦秦白起拔趙二城司  
馬錯拔楚上庸燕昭王卒子惠王繼以騎却代樂  
毅樂毅奔趙趙惠文王與秦昭襄王會于澠池藺  
相如相

壬午齊田單大敗燕君于即墨獲將騎却復城七十迎  
襄王自莒入臨菑封田單安平君秦白起拔楚西



陵

癸未楚頃襄王出奔陳郢陷于秦大良造白起破楚入  
郢燒夷陵以郢為南郡封起武安君

繼

甲申秦拔楚巫及黔中作黔中郡魏昭王卒子安釐王  
乙酉楚東取江旁十五邑以扞秦魏拔秦二城封無忌  
信陵君

丙戌秦兵圍大梁魏入溫請和秦以穰侯為相國韓暴

戴救魏不利趙廉頗拔魏房子安陽

丁亥魏芒卯攻韓不利秦師救韓敗趙魏之師十五萬  
于華陽魏入南陽請和以其地為南陽郡

戊子韓釐王卒子桓惠王繼趙取東胡地

己丑楚黃歇奉太子完入秦為質求平又取韓魏伐燕  
田單拔燕中陽秦會楚韓趙魏伐燕燕惠王卒子  
武成王繼趙藺相如伐齊

庚寅秦穰侯伐齊取剛壽以廣陶邑范雎自魏入秦

辛卯秦師伐韓以逼周

壬辰秦中更胡傷攻趙闕與趙奢擊之有功封馬服君  
與廉頗同位秦人為之少懼

癸巳秦拔魏懷義

經世之已二千二百二十六

甲午周赧王四十八年秦太子卒于魏

乙未秦拔魏鄆邱罷穰侯相國及宣太后權以客卿范  
雎為相封應侯魏冉就國趙惠文王卒子丹繼是

謂孝成王太后專政

丙申齊襄王卒子建繼田單攻趙秦以安國君為太子  
宣太后卒拔趙三城進圍邯鄲趙出長安君為質  
于齊求救趙勝為相封平原君

丁酉齊用田單為相秦白起伐韓拔九城

戊戌楚頃襄王卒太子完自秦亡歸繼是謂考烈王以  
左徒黃歇為令尹號春申君封于吳食淮北地秦  
白起拔韓南郡

已亥楚獻地于秦乞和秦五大夫賁伐韓拔十五城以  
絕太行路韓馮亭以上黨入于趙趙受韓上黨廉  
頗軍長平

庚子楚伐魯取徐州秦白起攻趙長平

辛丑秦武安君大敗趙軍于長平進圍邯鄲趙以趙括  
代廉頗將長平遂陷兵四十萬為秦所坑

壬寅秦分軍為三罷武安君白起將以王齕代攻趙拔  
趙武安及皮牢司馬梗北定上黨趙使蘇代使秦

癸卯秦加范雎相國王齕圍邯鄲張唐攻魏燕武成王

卒子孝王繼趙平原君求救于楚魏

甲辰楚春申君魏信陵君救趙秦起武安君白起不克  
殺之于杜郵

乙巳周赧王會齊韓趙魏兵出伊闕攻秦不利西奔秦  
秦昭王滅周盡入其地三十六城徙其王于愚狐  
楚滅魯以齊荀卿為蘭陵令

丙午秦徙周民及九鼎于咸陽蔡澤自燕入秦代范雎

相燕孝王卒子喜繼

丁未楚齊韓燕趙皆服于秦魏獨後秦使將軍繆伐之  
取吳城

戊申秦郊上帝于雍邱趙徙都鉅鹿

己酉趙平原君卒

庚戌秦昭襄王卒太子安國繼是謂孝王立三日又卒

子楚立是謂莊襄王以華陽夫人為后子政為太子  
子呂不韋為丞相封文信侯食河南十萬戶楚春

申君入弔于秦燕將栗腹攻趙不利趙廉頗破燕  
軍于鄢封信平侯

辛亥東周君會諸侯攻秦不利没于秦秦丞相呂不韋  
平東周盡入其地置三川郡徙其君于陽人趙廉  
頗伐燕圍其國

壬子秦蒙騫拔趙太原拔韓滎陽及成臯

癸丑秦蒙騫拔魏高都又舉趙三十城楚齊魏韓燕趙  
攻秦不利



甲寅秦莊襄王卒太子政繼是謂始皇帝以呂不韋為相國號仲父同太后專政李斯為舍人齊田單屠聊城魏無忌自趙歸國率楚齊韓趙燕五國之師敗秦軍于河外走蒙驁追至函谷

乙卯秦蒙驁平晉陽

丙辰趙孝成王卒子偃繼是謂悼襄王以樂乘代廉頗將頗奔魏

丁巳秦蒙驁攻魏拔二城攻韓拔十二城

戊午魏釐王卒子景湣王卒信陵君亦卒趙將李牧取

燕二城

己未秦拔魏二十城置東郡趙伐燕獲將劇辛

庚申楚考烈王會齊韓趙魏燕五國之兵伐秦至于函  
谷不利東徙都壽春春申君就國于吳

辛酉秦拔魏之汲趙拔魏之鄴

壬戌秦封嫪毐長信侯關政于內韓桓惠王卒子安繼  
癸亥長信侯嫪毐作難攻鄴年宮不克伏誅徙太后于

雍流蜀者四千家楚考烈王卒子幽王悍繼

經世之午二千二百二十七

甲子秦始皇帝十年呂不韋坐嫪毐事免相李斯為相  
齊趙來置酒復華陽太后于甘泉宮

乙丑秦王翦桓齮拔趙九城趙悼襄王卒子遷繼秦兵  
攻鄴

丙寅秦會魏伐楚及韓文信侯呂不韋自殺

丁卯秦桓齮大敗趙軍十萬于平陽韓公子非使秦不

還

戊辰秦桓齟破趙宜安及赤巖韓王安朝秦

己巳秦伐趙一軍攻鄴一軍攻狼孟燕太子丹自秦逃

歸趙李牧扞秦有功

庚午魏獻秦麗邑

辛未秦內史勝滅韓獲其王以其地為潁川郡

壬申秦王翦下井陘大破趙軍進圍鉅鹿趙以趙葱代

李牧顏聚代司馬尚將

癸酉秦王翦滅趙獲其王以其地為趙郡楚幽王卒母弟猶立庶兄負芻殺猶代立魏景湣王卒子假繼趙亡太子喜稱王于代會燕軍于上谷

甲戌秦王翦破燕軍于易水燕荊軻使秦不還

乙亥秦王翦王賁滅燕獲其太子丹剪謝病還拔楚城丙子秦王賁滅魏決河灌大梁獲其王

丁丑秦王翦破楚殺其將項燕楚喪師于蘄走壽春

戊寅秦王翦蒙武滅楚獲其王以其地為楚郡

已卯秦王賁平遼東獲燕王平代獲趙太子王翦定越  
以其地為會稽郡

庚辰秦王翦滅齊獲其王以其地為齊郡東至海及朝  
鮮西至臨洮羌中南至北嚮戶北至陰山遼東分  
天下地為三十六郡罷侯置守鑄天下兵為十二  
金人徙天下豪富十二萬戶于咸陽大建宮室作  
阿房為萬世業稱始皇帝更以建亥月為歲首  
辛巳西巡狩至于隴右北地及回中乃復

壬午東巡狩至于鄒嶧封太山禪梁甫南登琅邪丞相  
隗林王綰卿士李斯王戊五大夫趙嬰將軍楊膠  
及九侯勒帝功于金石表于海上遂南至于衡山  
浮江自南郡由武關乃復

癸未東巡狩至博浪沙中遇盜遂登之罘刻石紀功北  
由上黨乃復

甲申

乙酉

丙戌北巡狩至于碣石由上郡乃復使蒙恬擊胡取河  
南地

丁亥南取陸梁地為桂林象郡又北斥匈奴自榆中並  
河以東屬之陰山為三十四縣城河上為塞又使  
蒙恬渡河取高闕陶山北假中築亭障

戊子置酒咸陽宮聚天下書焚之

己丑聚天下學士于驪山坑之廣阿房宮自咸陽達于  
渭南



庚寅

辛卯南巡狩至于雲夢左丞相馮去疾留守右丞相李  
斯從行少子胡亥請行至九疑浮江東至于會稽  
又北至于琅邪由平原達沙丘崩左丞相李斯宦  
氏趙高假帝書更立少子胡亥賜上郡太子將軍  
蒙恬死遂還咸陽胡亥立是謂二世皇帝葬始皇  
帝驪山

壬辰宦氏趙高為中郎令專政東巡狩至于會稽北又

至于遼東乃復大殺王族及羣臣復廣阿房徵天下材士以五萬人為屯衛咸陽三百里不得食其穀戍卒陳勝稱王于楚關東郡邑皆殺其令長以應陳勝而西攻秦陳勝將武臣稱王于趙魏咎稱王于魏狄人田儋稱王于齊楚人項梁兵會稽徐人劉季稱兵豐沛陳勝兵西攻秦至于戲

癸巳秦殺右丞相馮去疾將軍馮劫及囚左丞相李斯諫罷阿房故也將軍章邯滅陳勝于城父破項梁

于定陶平田儋于臨濟渡河北攻趙田儋死其弟  
榮立儋子市為王陳勝將秦嘉立勝子景駒為王  
項梁殺景駒求楚懷王孫心立之保盱台項梁死  
其子羽軍彭城其將劉季軍碭山楚王心收項梁  
軍自盱台徙彭城以劉季為碭郡長封武安侯俾  
南略地而西攻秦以項羽為魯國公封長安侯俾  
北救趙而西攻秦約先入關者王

經世之未二千二百二十八

甲午秦二世三年中郎令趙高稱丞相殺李斯及弑其君胡亥于望夷宮代立不克立二世兄之子嬰為王嬰立夷趙高三族沛公兵十萬由武關入至咸陽秦子嬰降于軹道收圖籍封宮室府庫示衆人以約法三章還軍霸上以待東諸侯項羽北救趙殺大將軍宋義至鉅鹿大敗章邯軍于洹水秦軍降者二十萬悉坑之于新安合齊趙魏韓燕五國之兵四十萬由函谷而入會沛公于戲而屠咸陽

殺子嬰收子女玉帛焚宮室府庫

乙未項羽渝約自主封建立楚王心為義帝徙之江南  
都郴封沛公季為漢王遷之漢中都南鄭分秦關  
中為三一封降將張邯為雍王都廢邱一封降將  
司馬欣為塞王都櫟陽一封降將董翳為翟王都  
高奴分齊為三一封齊將田都為臨菑王都臨菑  
一封齊將田安為濟北王都博陽一封齊王田市  
為膠東王都即墨分楚為三一封楚將英布為九

江王都六一封楚將共敖為臨江王都江陵一封  
番君吳芮為衡山王都邾分趙為二一封楚將張  
耳為常山王都襄國一封趙王歇為代王都鴈門  
分韓為二封楚將申陽為河南王都洛陽一封韓  
成為韓王都陽翟分魏為二一封趙將司馬卬為  
殷王都朝歌一封魏王豹為魏王都平陽分燕為  
二一封燕將臧荼為燕王都薊一封燕王韓廣為  
遼東王都無終封吳芮將梅鋗十萬戶侯趙歇將

陳餘環三縣田市將田榮不及封羽自稱西楚伯  
王王梁地九郡都彭城諸王之在戲下者咸遣罷  
兵就國羽亦東出使人殺義帝于江上殺韓王成  
以鄭昌代之臧荼殺韓廣于燕并有其地田榮殺  
田都田安田市于齊并有其地稱齊王彭越受榮  
符以覆梁地陳餘受榮兵以破常山趙王歇自代  
遷都鉅鹿張耳走漢項羽北破田榮于齊榮死弟  
橫立榮子廣復保城陽

丙申漢王自南鄭東收三秦二韓五侯兵合三河士五十六萬東伐楚入彭城取重寶美女為置酒高會項羽至自伐齊大敗漢軍于睢水殺十餘萬并獲漢王父母妻子漢王退保滎陽築甬道以通敖倉粟使將韓信張耳攻魏趙丞相蕭何兵至自關中自此日戰于京索間

丁酉楚圍漢于滎陽拔之紀信周苛縱公死之漢退師保成臯九江王英布降于漢彭越破楚軍于下邳



韓信張耳平魏趙還軍脩武漢王自成臯北渡河  
至脩武使張耳收兵越地韓信伐齊盧綰劉賈南  
渡白馬津會彭越攻楚楚又拔漢成臯

戊戌漢復取成臯與楚對兵廣武韓信平齊乞封假王  
項羽請和約分天下于鴻溝歸漢王父母妻子還  
軍至陽夏漢軍復至楚復敗漢軍漢又大會韓信  
彭越英布及諸侯兵于垓下

己亥漢滅楚項羽死于東城漢王以魯國公禮葬羽于

穀城楚之諸侯而王者並降封侯封齊王韓信為  
楚王治下邳建成侯彭越為梁王治定陶九江王英  
布為淮南王治廣陵韓王信為韓王治陽翟衡山  
王吳芮為長沙王治臨湘肇帝位于汜水之陽西  
都長安大建宮室燕王臧荼不恭命攻下代郡往  
平之獲臧荼以太尉盧綰為燕王齊王田廣卒叔  
橫立入于海

庚子帝游雲夢會諸侯于陳執楚王韓信歸降為淮陰

侯分其地為二一封劉賈為荊王治淮東一封弟  
交為楚王治淮西別封子肥為齊王徙韓王信為  
太原王匈奴寇馬邑韓王信以眾叛帝尊父太公  
為太上皇

辛丑帝北征韓王信于銅鞮信走匈奴遂及匈奴至于  
平城匈奴圍帝于平城七日樊噲北定代以兄仲  
為代王

壬寅建未央宮代王劉仲自雁門逃歸廢為合陽侯以

陳豨為代王

癸卯大朝諸侯于未央宮趙相貫高事覺

甲辰太上皇及太上后崩陳豨以雁門叛帝北征誅淮陰侯韓信并夷三族以蕭何為相國

乙巳梁王彭越以定陶叛平之夷三族淮南王英布以廣陵叛兼有淮東西地

丙午帝征淮南平之夷英布三族周勃平代獲陳豨于當城帝崩太子盈踐位是謂惠帝太后呂氏臨朝

稱制蕭何曹參陳平周勃輔政葬高祖于長陵盧  
綰以燕叛

丁未太后殺趙王如意及其母夫人戚氏齊王肥獻陽  
城為魯元公主湯沐邑

戊申相國蕭何卒曹參為相國

己酉城長安

庚戌除挾書律

辛亥相國曹參卒王陵為右丞相陳平為左丞相

壬子太尉樊噲卒周勃為太尉

癸丑惠帝崩立無名子為帝葬惠帝于安陵封呂氏四  
人為王六人為侯罷王陵相進陳平右丞相以審  
食其為左丞相關政于內太后專制名雉

申寅

乙卯

丙辰

丁巳幽無名子于永巷殺之立恒山王義為帝

戊午尉它稱帝南越

己未匈奴寇狄道

庚申太后殺趙王友以梁王呂產為相國趙王呂祿為  
上將軍分統南北軍

辛酉太后呂氏崩丞相陳平太尉周勃朱虛侯劉章曲  
周侯酈商及子寄誅呂祿呂產獲南北軍夷呂氏  
三族廢恒山王義迎高祖中子代王恒于鴈門立  
之是謂文帝以宋昌為衛將軍專南北軍丞相陳

平讓周勃右丞相而為左丞相灌嬰為太尉張武  
為中郎

壬戌以皇子啓為皇太子周勃免相陳平兼左右丞相  
癸亥丞相陳平卒周勃復相始作銅虎符

經世之申二千二百二十九

甲子漢孝文皇帝三年免周勃相以灌嬰為相王興居  
以濟北叛平之匈奴寇北地

乙丑絳侯周勃下廷尉



丙寅

丁卯王長以淮南叛徙之蜀放賈誼于長沙

戊辰

己巳

庚午

辛未

壬申

癸酉

甲戌除肉刑

乙亥

丙子祀上帝

丁丑

戊寅改稱元年是謂後元

己卯

庚辰

辛巳

壬午

癸未匈奴寇雲中上郡命六將屯備周亞夫軍細柳

甲申文帝崩太子啓踐位是謂孝景皇帝葬太宗于灊陵

乙酉與匈奴約和親

丙戌

丁亥吳王濞膠西王卬楚王戊趙王遂濟南王辟光菑川王賢膠東王雄渠七國連叛誅御史大夫晁錯

七國平梁孝王霸有東土

戊子以皇子榮為皇太子

己丑以公主嬪于匈奴

庚寅

辛卯廢皇太子榮以膠東王徹為皇太子太尉周亞夫

為丞相

壬辰改稱元年是謂中元

癸巳

經世之酉二千二百三十

甲午漢孝景皇帝十年周亞夫免相

乙未

丙申

丁酉

戊戌再改元是謂後元周亞夫下獄死

己亥

庚子景帝崩皇太子徹踐位是謂孝武皇帝葬景帝于

陽陵

辛丑改建元元年

壬寅竇嬰免相田蚡免太尉

癸卯

甲辰

乙巳

丙午

丁未改元元光始令郡國貢孝廉董仲舒起焉

戊申命將五兵三十萬大伐匈奴不利

巳酉

庚戌竇嬰棄市田蚡卒

辛亥廢皇后陳氏以衛夫人為皇后弟青為將軍

壬子命將四大伐匈奴無功

癸丑改元元朔

甲寅衛青伐匈奴有功收河南置朔方五原郡

乙卯

丙辰匈奴寇上郡

丁巳匈奴寇鴈門衛青伐之有功拜大將軍公孫弘為

丞相封平津侯

戊午衛青征匈奴大有功霍去病為嫖姚校尉張騫通

西域有功封博望侯

己未改元元狩獲白麟故也淮南王安衡山王賜二國

叛平之冊據為皇太子

庚申霍去病征匈奴至于居延拜驃騎將軍李廣征匈



奴無功謫為庶人

辛酉

壬戌衛青霍去病李廣大伐匈奴李廣自殺

癸亥丞相李蔡自殺

經世之戌二千二百三十一

甲子漢孝武皇帝二十四年大司馬霍去病卒

乙丑改元元鼎

丙寅丞相翟青下獄死

卷六上  
丁卯徙函谷關于新安

戊辰封方士樂大為樂通侯

己巳南越王相呂嘉叛諸侯坐酎金輕奪爵者一百六十人丞相趙周下獄死樂通侯樂大坐誣罔棄市  
西羌及匈奴寇五原

庚午南寇平東越王餘善叛卜式為御史大夫

辛未改元元封帝征匈奴至于北海東越殺餘善降有事于東西中三嶽及禪梁甫東巡狩至于碣石西

歷九原歸于甘泉

壬申復巡太山作瓠子隄朝鮮寇遼東

癸酉朝鮮殺其王右渠以降祀汾陰后土

甲戌

乙亥南巡狩至于盛唐大司馬衛青卒

丙子西幸回中及祀汾陰后土

丁丑改元太初東巡太山更以建寅月為歲首西伐大

宛起建章

戊寅北幸河東祀后土騎二萬征匈奴不復

已卯東巡海上匈奴寇張掖酒泉

庚辰李廣利平大宛獲其王及汗血馬

辛巳改元天漢中郎將蘇武使匈奴北幸河東

壬午東巡至于海上又西幸回中將軍李陵征匈奴不

還

癸未東巡太山又北幸常山匈奴寇鴈門

甲申大伐匈奴不利朝諸侯于甘泉宮

乙酉改元太始

丙戌西幸回中

丁亥東巡海上

戊子東巡太山

己丑改元征和巫蠱事起

庚寅太子殺江充丞相劉屈氂攻太子戰于長安太子  
敗死皇后自殺諸邑公主皆坐巫蠱死

辛卯大伐匈奴巫蠱事覺誅丞相劉屈氂

壬辰東巡海上天下疲于兵革

癸巳改元後元重合侯馬通叛

經世之亥二千二百三十二

甲午漢孝武皇帝五十四年冊皇子弗陵為皇太子帝

幸盤屋五柞宮崩太司馬霍光受顧命太子弗陵

嗣皇帝位是謂昭帝葬世宗于茂陵大將軍霍光

專政

乙未改元始元

丙申

丁酉

戊戌

己亥

庚子

辛丑改元元鳳誅鄂邑長公主及燕王旦左將軍上官

桀謀害霍光事覺故也

壬寅

癸卯

甲辰丞相田千秋卒

乙巳丞相王訢卒

丙午

丁未改元元平帝崩昌邑王賀立葬昭帝于平陵賀立  
不明大將軍霍光廢之迎戾太子孫詢立之是為

孝宣皇帝丙吉為相

戊申改元本始



己酉命將五兵十五萬大伐匈奴

庚戌

辛亥皇后許氏遇毒崩霍光以女上皇后

壬子改元地節

癸丑大司馬大將軍霍光卒子禹繼事

甲寅冊皇子奭為皇太子

乙卯大司馬霍禹謀逆事覺夷三族廢皇后霍氏

丙辰改元元康

丁巳冊王氏為皇后

戊午太子太傅䟽廣太子少傅䟽受謝病歸東海

己未

庚申改元神崔趙充國伐西羌

辛酉

壬戌蕭望之為御史大夫

癸亥潁川太守黃霸賜爵關內侯河南太守嚴延年棄

市

觀物篇三十二 以運經世八

經元之甲一

經會之午七

經運之庚一百八十七

經世之子二千二百三十三

甲子漢孝宣皇帝十七年改元五鳳左馮翊太守韓延壽棄市貶蕭望之為太子太傅坐慢丞相酈吉也  
平通侯楊惲棄市坐怨望也

乙丑

丙寅丞相耶吉卒黃霸為相

丁卯

戊辰改元甘露

己巳

庚午匈奴呼韓邪單于來朝于定國為相

辛未

壬申改元黃龍宣帝崩于未央宮皇太子奭之踐位是

謂孝元皇帝

癸酉改元初元葬中宗于杜陵

甲戌冊皇子鷺為皇太子盜殺蕭望之

乙亥

丙子韋河東

丁丑

戊寅改元永光

己卯西羌叛韋元成為相

庚辰西羌平

辛巳

壬午

癸未改元建昭

甲申

乙酉匡衡為相

丙戌

丁亥

戊子改元竟寧帝崩皇太子驚踐位是謂孝成皇帝葬

高宗于渭陵王鳳為大司馬大將軍專政

己丑改元建始

庚寅

辛卯王商薛宣免相匡衡為庶人

壬辰河大決王商為相

癸巳改元河平

經世之丑二千二百三十四

甲午漢孝成皇帝六年

乙未

丙申

丁酉改元陽朔京兆尹王章下獄死張禹為相

戊戌王音為御史大夫

己亥大司馬王鳳卒弟音繼事

庚子

辛丑改元鴻嘉



壬寅幸雲陽

癸卯廢皇后許氏

甲辰

乙巳改元永始封王莽新都侯冊趙飛燕為皇后

丙午大司馬王音卒王商為大司馬翟方進為相孔光  
為御史大夫

丁未

戊申大司馬王商免王根為大司馬

己酉改元元延

庚戌

辛亥

壬子

癸丑改元綏和

甲寅成帝崩皇太子欣踐位是謂孝哀皇帝太后王氏  
臨朝稱制大司馬王根專政葬成帝于延陵王根  
罪免丁明為大司馬孔光為丞相

乙卯改元建平冊傅氏為皇后傅喜為大司馬朱博為

大司空

丙辰傅喜免丁明復為大司馬孔光免朱博自殺

丁巳相王商薨王嘉為相

戊午息夫躬下獄死

己未改元元壽相王嘉下獄死大司馬丁明免

庚申三公分職董賢為大司馬孔光為大司徒彭宣為

大司空帝崩太皇太后王氏稱制罷董賢大司馬

以王莽為大司馬錄尚書事廢太后趙氏迎元帝  
庶孫中山王衍立之是謂平帝莽哀帝于義陵王  
莽專政

辛酉改元元始封大司馬王莽安漢公

壬戌

癸亥

經世之寅二千二百三十五

甲子漢孝平皇帝四年王莽以女上皇后

乙丑王莽弑帝于未央宮立元帝孫孺子嬰莽加九錫  
丙寅王莽改元居攝

丁卯王莽稱假皇帝翟義立嚴鄉侯信于東都莽將王  
邑滅之

戊辰王莽改元初始

己巳王莽竊國命改國為新室元曰始建國降孺子嬰  
為定安公

庚午王莽大殺宗室校書郎揚雄投天祿閣不克死

辛未

壬申

癸酉

甲戌王莽改元天鳳四夷交侵中國

乙亥

丙子

丁丑羣盜起

戊寅

己卯校書郎揚雄卒

庚辰王莽改元地皇兵起綠林

辛巳

壬午劉玄稱兵宛鄴劉秀及兄伯升稱兵舂陵

癸未劉玄稱帝元曰更始以劉伯升為司徒劉秀為太常偏將軍是年大破莽將王尋王邑軍于昆陽三輔遂滅莽于漸臺劉玄拜劉秀破虜大將軍行大司馬事使持節巡撫河北王郎以王子林稱帝邯

鄆

甲申劉玄西入長安殺漢孺子嬰大將軍劉秀北徇薊  
還拔邯鄲誅王郎受玄封蕭王又敗銅馬賊于鄆  
又敗赤眉賊于射犬赤眉西攻長安劉永擅命睢  
陽公孫述稱王巴蜀李憲稱王淮南秦豐稱王黎  
邱張步稱兵瑯琊董憲稱兵東海延岑稱兵漢中  
田戎稱兵夷陵

乙酉蕭王肇帝位于河朔之鄆國曰漢元曰建武南拔



洛陽都之赤眉陷長安稱帝殺劉玄公孫述稱帝  
成都元曰龍興劉永稱帝睢陽隗囂稱兵隴右盧  
芳稱兵安定彭寵稱兵薊門

丙戌赤眉焚長安宮室陵寢銅馬赤犢尤來立孫登為  
帝于上郡其將樂方殺之

丁亥赤眉降漢于宜陽長安平蓋延平劉永于睢陽隗  
囂以西州格命李憲稱帝淮南

戊子

卷六上  
已丑彭寵為家奴所殺來降封不義侯薊門平朱祐平  
秦豐于黎邱滅張步于臨淄盧芳稱帝五原帝徵  
嚴光不起

庚寅馬成平李憲于淮南吳漢平董憲于東海隗囂以  
入西州入于蜀

辛卯

壬辰西征馮異竇融破隗囂于隴右

癸巳隗囂死子純立來歙馮異伐蜀入天水

經世之卯二千二百三十六

甲午漢光武皇帝十年西征臧隗純于隴右

乙未西征蜀至于南陽吳漢岑彭大破蜀軍于荊門

丙申吳漢拔成都誅公孫述及將田戎岑延

丁酉盧芳自五原亡入匈奴

戊戌天下平

己亥大司徒歐陽歙下獄死

庚子交趾女徵側叛青徐幽冀盜起

辛丑南巡廢皇后郭氏為中山太后冊貴人陰氏為皇后

壬寅西巡史歆以成都叛吳漢復平之馬援伐交趾幸長安

癸卯南巡馬援平交趾封新息侯廢皇太子彊為東海王以東海王陽為皇太子改名莊

甲辰大司徒戴涉下獄死

乙巳

丙午

丁未

戊申

巳酉馬援破武陵蠻

庚戌作壽陵

辛亥

壬子

癸丑

甲寅東巡狩

乙卯

丙辰東封太山禪梁甫改元中元西幸長安馮魴為司空

丁巳帝崩皇太子莊踐位是謂孝明皇帝葬世祖于原陵

戊午改元永平

己未

庚申

辛酉

壬戌北巡至于鄴

癸亥東巡至于岱

經世之辰二千二百三十七

甲子漢孝明皇帝七年

乙丑

丙寅

丁卯南巡狩

戊辰

己巳牟融為司空

庚午河大決

辛未

壬申東巡狩

癸酉司徒邢穆駙馬都尉韓光下獄死

甲戌



乙亥帝崩皇太子烜踐位是謂孝章皇帝葬顯宗于節陵

丙子改元建初

丁丑

戊寅

己卯鮑昱為太尉桓虞為司徒詔于白虎觀議五經異同

庚辰

辛巳

壬午廢皇太子慶為清河王冊皇子肇為皇太子北幸

鄴西幸長安

癸未東巡狩

甲申改元元和南巡狩鄭弘為太尉

乙酉東巡狩

丙戌北巡狩

丁亥改元章和南巡狩

戊子帝崩皇太子肇踐位是謂孝和皇帝太后竇氏臨  
朝稱制竇憲為車騎將軍專政葬肅宗于敬陵鄧  
彪為太尉錄尚書事

己丑改元永元竇憲敗匈奴于稽落勒功燕然還為大  
將軍

庚寅

辛卯帝加元服班超平西域

壬辰竇憲作逆事覺伏誅帝始親萬機

癸巳

經世之巳二千二百三十八

甲午漢孝和皇帝六年

乙未

丙申

丁酉司徒劉方有罪自殺

戊戌

己亥

庚子張酺罷太尉張禹為太尉

辛丑魯恭為司徒

壬寅廢皇后陰氏冊貴人鄧氏為皇后徐防為司空

癸卯南巡

甲辰司徒魯恭罷免徐防為司徒陳寵為司空

乙巳改元元興帝崩皇子隆立是謂殤帝太后鄧氏臨

朝稱制車騎將軍鄧騭專政

丙午改元延平葬穆宗于慎陵帝又崩鄧騭迎章帝孫

祐立之是謂孝安皇帝葬殤帝于康陵尹勤為司空

丁未改元永初魯恭為司徒張禹為太尉張敏為司空

周章謀廢立不克自殺

戊申鄧騭為大將軍

己酉帝加元服

庚戌海寇亂

辛亥西羌入寇張禹免太尉

壬子太后鄧氏有事于太廟劉愷為司空

癸丑

甲寅改元元初司馬苞為太尉

乙卯冊閭氏為皇后劉愷為司徒袁敞為司空

丙辰李咸為司空

丁巳

戊午

己未

庚申改元永寧楊震為司徒

辛酉改元建光太后鄧氏崩帝始親政事特進鄧騭度  
遼將軍鄧遵下獄死

壬戌改元延光

癸亥司徒楊震為太尉

經世之午二千二百三十九

甲子漢孝安皇帝十八年東巡廢皇太子保為濟陰王

楊震罷太尉馮石為太尉



乙丑帝南巡崩于葉太后閻氏臨朝稱制閻顯為車騎將軍專政立章帝玄孫北鄉侯懿誅大將軍耿寶葬恭宗于恭陵懿又卒車騎將軍閻顯及大長秋江京閉宮門擇立宅子中黃門孫程十九人殺江京迎濟陰王立之是謂孝順皇帝顯兵入北宮不勝孫程取閻顯及江京之黨殺之亂乃定以王禮葬北鄉侯馮石為太傅劉喜為太尉李郃為司徒丙寅改元永建皇太后閻氏崩桓焉為太傅朱寵為太

尉朱倭為司徒

丁卯

戊辰

己巳帝加元服龐叅為太尉王龔為司空劉俊為司徒

庚午班勇棄市

辛未

壬申改元陽嘉冊梁氏為皇后

癸酉施延為太尉

甲戌黃尚為司徒王卓為司空

乙亥

丙子改元永和王龔為太尉

丁丑郭虔為司空

戊寅劉壽為司徒

己卯誅中常侍張達

庚辰

辛巳趙誠為司空梁冀為大將軍

壬午改元漢安遣張綱等八使持節巡行天下廣陵寇亂趙峻為太尉胡廣為司徒

癸未彭門寇亂

甲申改元建康帝崩皇太子炳踐位是謂冲帝太后梁氏臨朝稱制大將軍梁冀專政葬敬宗于憲陵盜發憲陵免尚書藥巴為庶人

乙酉改元永嘉帝崩太后梁氏大將軍梁冀迎肅宗孫續立之是謂質帝葬冲帝于懷陵江淮寇亂九江

賊稱黃帝歷陽賊稱黑帝

丙戌改元本初梁冀弑帝迎肅宗曾孫志立之是謂桓  
帝李固罷免梁冀專政

丁亥改元建和梁冀以女上皇后杜喬為太尉胡廣罷  
免李固杜喬下獄死

戊子帝加元服趙戒為太尉袁湯為司徒  
己丑

庚寅改元和平太后梁氏崩

辛卯改元元嘉黃瓊為司空尋罷免

壬辰

癸巳改元永興袁成逢隗為三公

經世之未二千二百四十

甲午漢孝桓帝八年黃瓊為太尉尹頌為司徒

乙未改元永壽韓續為司空

丙申

丁酉

戊戌改元延熹

己亥皇后梁氏崩大將軍梁冀謀逆事覺夷三族黃門  
單超擅命胡廣韓續臧死

庚子白馬令李雲直諫死于獄太山及長沙寇亂

辛丑武庫火

壬寅

癸卯

甲辰南巡揚東為太尉

乙巳廢皇后鄧氏冊貴人竇氏為皇后陳蕃為太尉竇武為大將軍

丙午黨錮事起司隸李膺等三百人下獄  
丁未改元永康帝崩太后竇氏臨朝稱制

戊申竇氏迎肅宗玄孫解瀆亭侯宏立之是謂靈帝竇武錄尚書事專政改元建寧葬威宗于宣陵中常侍曹節王甫殺太傅陳蕃大將軍竇武及尚書尹勲侍中劉瑜屯騎校尉馮述夷其族徙太后竇氏



于南宮謀誅宦氏不克故也胡廣為太尉劉寵為  
司徒

己酉朋黨事復起殺李膺等百人

庚戌

辛亥帝加元服冊宋氏為皇后

壬子改元熹平太后竇氏崩誣構事大起

癸丑段熲為太尉楊賜為司空

甲寅李咸為太尉

乙卯五經文皆刻石于太學袁隗為司徒

丙辰劉寬為太尉楊賜為司徒

丁巳大伐鮮卑孟軻為太尉陳耽為司空

戊午改元光和合浦交趾內寇廢皇后宋氏大鬻爵至三公袁滂為司徒

己未諸貴臣下獄死者相繼宦氏誣故也劉郃為司徒段熲為太尉張濟為司空

庚申陳耽為司徒冉何氏為皇后

辛酉作宮市帝遊以驢為駕

壬戌

癸亥

經世之申二千二百四十一

甲子改元中平漢孝靈皇帝十七年黃巾寇起鄧盛為  
太尉張溫為司空侍中向栩張鈞下獄死閹人大  
起誣搆黃巾平

乙丑黑山賊起崔烈為司徒張延為太尉許相為司空

三輔寇亂陳耽劉陶坐直言死

丙寅張溫為太尉江夏兵起前太尉張延下獄死

丁卯賣官至關內侯曹嵩為太尉三輔盜起漁陽賊稱  
帝

戊辰天下羣盜起黃巾賊復寇羣國稱帝置八校尉以  
捕天下羣盜馬日磧為太尉曹操為典軍校尉袁  
紹為中軍校尉董重為驃騎將軍

己巳帝崩皇太子辯踐位皇太后何氏臨朝稱制大將

軍何進專政改元光熹封皇弟協為勃海王殺上  
軍校尉蹇碩驃騎將軍董卓及皇太后董卓氏議立  
協故也徙協為陳留王中常侍張讓段珪殺大將  
軍何進中郎袁術以兵攻東宮張讓段珪以帝及  
陳留王走北宮何苗攻北宮司隸校尉袁紹兵入  
大殺閹豎讓珪以帝及陳留王出走小平津尚書  
盧植兵追及之讓珪投于河死盧植以帝及陳留  
王還宮改元昭寧董卓自太原入廢帝為弘農王

立陳留王協是謂獻帝徙太后何氏于永安宮改  
元永漢卓弑太后何氏及弘農王辯于永安宮稱  
相國專制黃琬為太尉楊彪為司徒荀爽為司空  
袁紹入冀州

庚午改元初平天下兵起羣校尉推袁紹為主同攻董卓  
卓卓大殺宗室及官屬遷帝西都長安孫堅兵起  
荊州白波賊寇東郡劉虞為太傅种拂為司空

辛未董卓稱太師大焚洛陽宮闕及徙居民于長安孫

堅敗董卓兵于陽人入洛脩完諸帝陵寢引軍還  
魯陽黑山賊寇常山黃巾賊擾太山

壬申董卓將王允呂布誅卓于長安夷三族卓將李傕  
郭汜陷長安殺王允呂布走袁紹傕汜擅政以皇  
甫嵩為太尉淳于嘉為司徒曹操破黃巾于壽張  
孫堅卒子策代總其衆

癸酉李傕郭汜屠三輔朱儁為太尉趙溫為司空袁紹  
袁術交兵東方

甲戌改元興平帝加元服楊彪為太尉孫策據有江南  
乙亥李傕郭汜爭權相攻于長安楊定楊奉董承以帝  
東還曹操破呂布于定陶遂有兗州布走劉備

丙子帝還洛陽改元建安曹操徙帝都許昌

丁丑袁術稱帝九江并袁紹大將軍曹操破袁術于揚  
州呂布襲劉備于下邳劉備走曹操

戊寅曹操平呂布于下邳兼有徐州

己卯袁術死袁紹破曹操將公孫瓚于易水孫策破劉



勲于廬江

庚辰曹操大敗袁紹于官渡劉備去曹操奔劉表于荊州江南孫策卒弟權繼事

辛巳

壬午袁紹卒子尚繼事以弟譚為將軍

癸未袁尚袁譚相攻譚敗奔曹操

甲申曹操破袁尚于鄴兼有冀州尚走青州譚復奔尚  
乙酉曹操滅袁氏于青州譚死尚走烏丸

丙戌曹操破高幹于太原幹走荊州

丁亥曹操破烏丸于聊城袁尚走遼東死

戊子曹操殺太中大夫孔融遂領丞相荊州劉表卒子

琮繼事劉備起諸葛亮于南陽亮以吳周瑜兵大

破曹操于赤壁遂有荊州稱牧治公安

己丑孫權會劉備于京口劉備表孫權為徐州牧孫權

表劉備為荊州牧

庚寅曹操起銅爵臺于鄴孫權南牧交州

辛卯曹操平關中益州劉璋會劉備于葭萌孫權自京  
口徙治秣陵

壬辰曹操割河以北屬鄴孫權城石頭改秣陵為建業  
癸巳曹操以冀之十郡稱魏國公加九錫劉備攻劉璋  
于成都孫權捍曹操于濡須

經世之四百四十二

甲午漢獻帝二十六年曹操殺皇后伏氏及二皇子又  
破張魯米賊于漢中劉備克成都據有巴蜀孫權

取劉備三郡

乙未曹操以女上皇后又平張魯于漢中孫權劉備連  
兵攻曹操

丙申曹操進爵為魏王南伐吳

丁酉曹操用天子服器孫權稱表曹操報以婚禮

戊戌少府耿紀司直韋晃殺曹操不克伏誅操攻劉備  
進攻漢中

己亥劉備取曹操漢中稱王孫權取劉備荊州稱牧關

羽死之

庚子改元建康曹操卒子丕繼事是年丕代漢命于鄴  
是謂文帝改國曰魏元曰黃初降帝為山陽公葬  
太祖曹操于西陵自鄴徙都洛陽

辛丑魏郊祀天地是年劉備稱帝成都建國曰蜀元曰  
章武諸葛亮為相孫權自建業徙都鄂改鄂為武  
昌

壬寅魏加兵于吳蜀伐吳不利敗于猇亭是年孫權稱

王武昌是謂文帝建國曰吳元曰黃武通使于蜀  
以脩前好

癸卯蜀主備卒于白帝城太子禪繼是謂後主改元建  
興魏與蜀和親

甲辰魏伐吳

乙巳魏伐吳治兵廣陵蜀諸葛亮平四郡蠻

丙午魏帝丕終太子叡嗣位是謂明帝司馬懿為驃騎  
大將軍

丁未魏改元太和有事于南郊及明堂蜀諸葛亮出師  
漢中

戊申蜀諸葛亮圍魏陳倉吳破魏石亭

己酉蜀克魏武都吳孫權稱帝改元黃龍自武昌復徙  
都建業

庚戌魏伐蜀假司馬懿黃鉞蜀諸葛亮攻魏天水

辛亥蜀圍魏祁山

壬子蜀息軍黃沙吳改元嘉和

癸丑魏改元青龍蜀伐魏師出褒斜

甲寅魏南伐吳至于壽春西伐蜀至于渭南蜀諸葛亮  
卒于師吳伐魏師出合肥是年漢山陽公卒

乙卯魏大起洛陽宮室司馬懿為太尉蜀以蔣琬為大  
將軍專國事

丙辰

丁巳魏改元景初公孫淵以遼東叛稱王

戊午魏司馬懿平遼東蜀改元延熙吳改元赤烏



已未魏明帝叡終齊王芳繼司馬懿及曹爽輔政

庚申魏改元正始

辛酉吳全琮伐魏軍出淮南

壬戌蜀姜維伐魏軍出漢中

癸亥魏帝加元服司馬懿伐吳至于舒蜀將琬伐魏軍  
出漢中吳伐魏軍出六安

經世之戌二千二百四十三

甲子魏主芳五年蜀主禪二十一年吳主權二十三年

魏曹爽伐蜀無功

乙丑蜀伐魏費禕師出漢中吳將馬茂作難夷三族

丙寅

丁卯魏曹爽專政何晏秉機司馬懿稱病

戊辰蜀伐魏費禕師出漢中

己巳魏曹爽奉其君謁高平陵太傅司馬宣王稱兵于

內夷大將軍曹爽及其支黨曹義曹訓曹彥何晏

丁謚鄧颺畢軌李勝桓範張當三族迎帝還宮改

元嘉平復皇太后懿加九錫專國事

庚午魏伐吳南郡

辛未魏司馬懿宣王卒子師繼事吳改元太元

壬申魏伐吳不利吳改元神鳳權卒子亮繼改元建興

癸酉吳蜀伐魏

甲戌魏亂司馬師廢其君芳立高貴鄉公髦改元正元

師假黃鉞專制稱景王蜀伐魏姜維拔魏三城吳

改元五鳳

乙亥魏司馬師伐吳平淮南還許昌卒子昭繼事為大將軍錄尚書事專制蜀姜維敗魏軍于臨洮吳孫峻敗魏軍于壽春

丙子魏改元甘露大敗蜀軍于上邽司馬昭稱文王假黃鉞吳改元太平大將軍孫峻卒國亂

丁丑魏大將軍諸葛誕以揚州叛入于吳蜀伐魏姜維師出駱谷吳主亮始親政事

戊寅魏司馬昭伐吳拔壽春誅諸葛誕蜀改元景耀宦

氏黃皓專政吳亂大將軍孫綝廢其君亮立亮弟  
休改元永安綝作逆伏誅

巳卯

庚辰魏亂司馬昭弑其君髦立常道鄉公璜改元景元  
昭加九錫稱晉國公專制

辛巳

壬午魏鄧艾鍾會伐蜀

癸未魏滅蜀徙其君于洛陽蜀改元炎興是年國亡吳

出軍壽春救蜀不克

甲申司馬昭進爵為晉王增郡二十用天子服器改元  
咸熙以檻車徵鄧艾鍾會以蜀叛吳孫休卒濮陽  
王興中軍張布廢休子而立權廢子和之子皓改  
元元興皓立誅興及布

乙酉魏司馬昭卒子炎繼事是年炎代魏命是謂武帝  
改國為晉元曰太始降其君璜為陳留王徙于鄴  
吳徙都武昌改元甘露

丙戌吳改元寶鼎復還建業

丁亥晉立子衷為皇太子

戊子吳伐晉

己丑吳改元建衡南伐交趾

庚寅吳孫秀奔晉

辛卯吳平交趾蜀劉禪卒于晉

壬辰晉賈充以女上太子妃遂為司空吳改元鳳凰

癸巳晉何曾為司徒吳師寇晉弋陽

經世之亥二千二百四十四

甲午晉武帝十年吳王皓十年晉分幽州城平州

乙未晉改元咸寧吳改元天璽

丙申晉東西夷十七國內附

丁酉晉四夷內附吳改元天紀將邵凱夏祥逃入于晉

戊戌吳將劉翹祖始逃入于晉

己亥晉命賈充督揚渾瑯瑯王仲王戎胡奮杜預唐彬

王濬七將兵二十萬伐吳是年汲人發魏襄王塚



得書七十五卷

庚子晉平吳徙孫皓于洛陽改元太康

辛丑

壬寅東西夷二十九國脩貢山濤為司徒衛瓘為司空

賈充卒

癸卯孫皓卒魏舒為司徒

甲辰

乙巳

丙午

丁未

戊申

己酉汝南王亮為司馬假黃鉞

庚戌改元太熙武帝崩太子衷踐位是謂惠帝冊妃賈氏為皇后改元永熙葬武帝于峻陵王渾為司徒何邵為太師裴楷為少師和嶠為少保王戎為少傅衛瓘為太保石鑒為司空

辛亥改元元康皇后賈氏專制夷十二大臣族太傅楊  
駿太保衛瓘汝南王亮皆被戮焉廢太后楊氏為  
庶人徙之金墉遣諸王就國改元元康趙王倫為  
征西將軍

壬子賈后弑皇太后楊氏于金墉

癸丑

甲寅

乙卯武庫火

丙辰張華為司空秦雍寇亂齊萬年稱兵涇陽楊茂搜  
稱兵百頃

丁巳王戎為司徒何劭為僕射

戊午

己未賈后廢皇太子遹為庶人及其二子送之金墉裴  
顧為僕射

庚申改元永康皇后賈氏徙皇庶人于許昌殺之趙王  
倫梁王彤廢皇后賈氏為庶人送金墉殺之誅宰

相張華及僕射裴頠侍中賈謐又誅嵇康呂安石  
崇潘岳于東市倫假黃鉞稱國相專制以彤為太  
宰冊羊氏為皇后賈氏黨趙廋以成都叛

辛酉趙王倫竊命徙帝于金墉改元建始齊王冏成都  
王穎河間王顥兵入誅趙王倫及其黨迎帝反正  
冏大司馬專制以穎為大將軍顥為太尉改元永  
寧流人李特殺趙廋于成都張軌以梁州叛

壬戌長沙王乂河間王顥成都王穎新野王歆范陽王

虓兵入誅齊王罔送其族于金墉殺之又稱太尉  
專制改元太安流人李特以六郡稱兵廣漢

癸亥河間王顥成都王穎東海王越執長沙王又送之  
金墉殺之顥稱太宰專制于長安陸機陸雲兵死  
石冰以揚徐亂李特攻成都克死子雄繼

皇極經世書卷六上